

# MAHATHIR NAFI LETAK JAWATAN

27 NOV 1983

**A LUR SETAR 26 Nov. - Datuk Sri Dr. Mahathir Mohamad hari ini menafikan khabar - khabar angin kononnya beliau akan meletakkan jawatan sebagai Perdana Menteri.**

Dengan iringan tepukan gemuruh daripada kira-kira 50,000 orang rakyat yang membanjiri Lapangan Terbang Sultan Abdul Halim di Kepala Batas dekat sini untuk menyambut ketibaannya beliau berikrar akan terus memimpin negara selagi diperlukan oleh rakyat.

Beliau juga berikrar akan terus berjuang bagi mencapai segala cita-cita dan hasrat rakyat.

"Bukan saya sendiri yang memilih diri saya menjadi Perdana Menteri. Rakyat yang memilih saya. Dengan itu saya tidak berhak meletakkan jawatan melainkan rakyat sendiri yang menyuruh", katanya disambut dengan pekikan "jangan", "jangan" dan "hidup Mahathir".

Beliau menambah: "Saya akan berundur dengan rela hati sekiranya rakyat berfikir saya tidak lagi layak memimpin".

"Tidak ada pihak lain yang boleh menyuruh saya meletakkan jawatan selain daripada rakyat", tegasnya lagi.

Datuk Sri Dr. Mahathir menganggap dirinya sebagai "alat" untuk digunakan oleh rakyat mengikut kehendak mereka.

"Jika rakyat fikir alat ini tidak guna lagi, rakyat boleh buangkannya ke tepi dan pilih yang lain tetapi orang itu mestilah sanggup menjalankan tugasnya", katanya.

Datuk Sri Dr. Mahathir berkata beliau tidak akan kekal selama-lama tetapi yang kekal ialah rakyat sendiri.

"Mati seorang rakyat, akan diganti dengan dua yang lain, kalau kita rajin," katanya disambut gelak ketawa. "Inilah kedaulatan rakyat" tegasnya.

Sebelum itu, beliau berkata jika ditinjau dari sejarah didapati bahawa rakyat telah memperjuangkan nasib mereka sendiri.

Contoh yang baik ialah ketika menentang penubuhan Malayan Union bila semua rakyat telah memberi sokongan yang penuh hingga pihak British terpaksa tunduk, katanya.

Perdana Menteri menegaskan bahawa Malaysia memilih sistem demokrasi kerana ia adalah kehendak rakyat

sendiri kerana mereka tahu itulah cara paling baik untuk mereka.

"Sejak dijamin sistem itu rakyat sendiri telah merasa nikmatnya walaupun masih banyak lagi yang perlu dibuat", katanya.

Beliau berkata bahawa kita tidak hendak melawan sesiapa, kita tidak hendak mengambil kuasa sesiapa tetapi apa yang hendak diperjuangkan adalah menurut kehendak - kehendak perlembagaan.

"Kita juga mahu wujudkan semangat cintakan demokrasi di kalangan rakyat seperti mana yang ditentukan oleh perlembagaan", katanya.

Menerusi sistem demokrasi juga rakyat boleh menyingkatkan mana-mana pemimpin yang mereka fikir tidak layak.

Menurut Datuk Sri Dr. Mahathir sokongan rakyat kepada pemimpinnya tidak hanya dapat diukur menerusi jumlah undi yang didapatinya dalam pilihanraya.

"Sokongan sebenar ialah dari perasaan rakyat sendiri dan tidak dengan undi itu saja kerana undi itu adalah cuma sekeping kertas", katanya.

Perdana Menteri juga menegaskan perlunya dikekalkan sistem "suara ramai mengatasi suara tidak ramai", kerana itu adalah kehendak rakyat di negara ini.

Beliau yakin itu akan membolehkan rakyat memberi kepercayaan kepada para pemimpin yang mereka mahu.

Bagi pihaknya, Datuk Sri Dr. Mahathir berjanji akan terus cuba mencapai cita-cita dan hasrat rakyat.

"Inilah ikrar yang boleh saya berikan pagi ini," katanya dengan disambut tepukan gemuruh dan laungan "hidup Mahathir".

Mengenai memorandum dari "orang-orang tertentu" supaya kerajaan menghapuskan perlembagaan sekarang, Datuk Sri Dr. Mahathir berpendapat ini adalah satu bukti mereka cuba menubuh sebuah republik di negara ini.